

NË EMËR TË POPULLIT

GJYKATA THEMELORE PRISHTINË-DEGA PODUJEVË, Departamenti i Përgjithshëm-Divizioni Penal, i përbërë nga gjyqtari i vetëm gjykues Minir Hoti me pjesëmarrjen e sekretares juridike Fatmire Podvorica dhe bashkëpunëtoren profesionale Valbonë Fejza, në çështjen penale kundër të akuzuarit A.P., me vendbanim në rrugën "...", nr.4/22, në P., për shkak të veprës penale Mbajtja në pronësi, kontroll ose posedim të paautorizuar të armëve nga neni 374 par.1 të KPRK-së, sipas aktakuzës së Prokurorisë Themelore në Prishtinë - Departamenti i Përgjithshëm, PP.II.nr.5427/2017 të datës 03.10.2018, mbajti seancën e shqyrtimit fillestar më dt.02.04.2019 në praninë e Prokurorit të Shtetit Rexhep Maqedonci dhe të akuzuarit, të njëjtën ditë në prezencë të palëve mori, publikisht shpalli ndërsa me datë 02.04.2019 përpiloi këtë:

A K T G J Y K I M

I akuzuari:

A.P., nga i ati B., e ëma R., e gjinisë F., i lindur me dt. *data e lindjes...*, në Gj., me vendbanim në rrugën "...", nr.4/22, në P., i papunë, ka të kryer shkollën e mesme, i pa martuar, me gjendje të dobët ekonomike, me nr.personal 1174970447, Shqiptar – Kosovar, shtetas i Republikës së Kosovës.

Ë S H T Ë F A J T O R

Sepse:

Ekziston dyshimi i arsyeshëm se i pandehuri A.P., që nga data e pacaktuar e deri me datë 29.08.2018, rreth orës 18:00, në P., në kundërshtim me ligjin e zbatueshëm lidhur me armët ka poseduar armën e zjarrit, pistoletë e llojit "Zastava", modeli 99, e kalibrit 9.19, me numër serik 34764, e cila ditën kritike gjatë një kontrolli nga zyrtarët policor i ishte gjetur në një valixhe dore në bagazhin e autmjetit të tipit Audi A8, me targa të regjistrimit *targat e regjistrimit...*, dhe e njëjta i ishte konfiskuar nga policia.-

Me këtë ka kryer veprën penale Mbajtja në pronësi, kontroll ose posedim të paautorizuar të armëve nga neni 374 par.1 të KPRK-së.

Prandaj, gjykata në bazë të neneve 4, 7, 17, 41, 42, 45, 46, 62, 73, 74, 374 të KPRK-së, si dhe në bazë të neneve 365, 366, 369, 370, 450, 453, të KPPRK-së, e:

G J Y K O N

Të akuzuarin A.P. me dënim me gjobë në shumën prej 300€ (treqind/Euro) të cilin dënim i akuzuari është i detyruar ta paguaj brenda afatit prej 15 ditësh, nga dita kur aktgjykimi të merr formën e prerë.

Nëse i pandehuri nuk e paguan dënimin me gjobë brenda afatit prej 15 ditësh nga dita kur aktgjykimi të merr formën e prerë, atëherë dënimi me gjobë do t'i zëvendësohet me dënim burgimi, ashtu që për çdo 20€ (njëzet euro), të paguara do t'i llogaritet 1(një) ditë burg.

Detyrohet i akuzuari që në emër të shpenzimeve të procedurës penale-për paushallin gjyqësor të paguaj shumën prej 20€ (njëzet/€uro), ndërsa në emër të taksës për kompensimin e viktimave të paguaj shumën prej 30€ (tridhjetë/€uro), në afat prej 15 ditësh nga dita kur aktgjykimi të merr formën e prerë.

Konform nenit 62 par.1 dhe 2 nën par.2.7 dhe nenit 69 par.1 të KPRK-së, të akuzuarit gjithashtu i shqipton këtë:

DËNIM PLOTËSUES

Konfiskohet arma e llojit pistoletë “Zastava”, modeli 99, e kalibrit 9.19, me numër serik 34764, me një karikator dhe 13 fishekë zjarri të të njejtës armë, të bashkangjitura në shkresat e lëndës të Policisë së Kosovës –Stacioni Policor në P., me numër të rastit 2017-AF-0706 të dt.16.04.2018, si mjet i kryerjes së veprës penale.

A r s y e t i m

Prokuroria Themelore Prishtinë - Departamenti i përgjithshëm, ka ushtruar aktakuzën PP.II.nr.5427/2017 të datës 03.10.2018, kundër të akuzuarit A.P., me vendbanim në rrugën “...”, nr.4/22, në P., për shkak të veprës penale Mbajtja në pronësi, kontroll ose posedim të paautorizuar të armëve nga neni 374 par.1 të KPRK-së.

Lidhur me këtë çështje penale gjykata caktoi dhe mbajti seancën e shqyrtimit fillestar më datë 02.04.2019, gjatë të cilës prezantuan Prokurori i Shtetit Rexhep Maqedonci nga Prokuroria Themelore në Prishtinë dhe i akuzuari A.P.

I akuzuari në seancën e shqyrtimit fillestar deklaroi se e pranojë fajësinë, armën e kam pasur për vetëmbrojtje, në atë kohë kam qenë në punë dhe e kam mbajtur pazarin ditor dhe jam friguar se po mi merr ndokush me dhunë dhe më është dashur të mbajë armë, armën nuk e kam përdorur për të friguar askënd dhe e kam dorëzuar menjëherë, i`a kam dërguar policisë pa kurrfarë problemi, me vjen keq që ka ndodhur ky rast, i premtoj gjykatës se ky rast nuk ka me u përsëritur, jam i pa punë dhe lus gjykatën që të më shqiptoj një dënim sa më të lehtë sepse nuk kam mundësi me paguar, jam mbajtës i familjes gjashtë antarëshe.

Gjyqtari i vetëm gjykues vërteton se i akuzuari e ka kuptuar natyrën dhe pasojat e pranimin të fajësisë, pranimi i fajësisë u bë vullnetarisht nga i akuzuari, pranimi i fajësisë mbështetet në faktet e çështjes që i përmban aktakuza në materialet e prezantuara nga prokurori i shtetit dhe aktakuza nuk përmban asnjë shkelje ligjore apo gabime faktike.

Prokurori i Shtetit nga Prokuroria Themelore në Prishtinë, lidhur me pranimin e fajësisë nga ana e të akuzuarit ka deklaruar se pajtohem me pranimin e fajësisë nga ana e të akuzuarit ngase është në përputhje me provat të cilat gjenden në shkresat e lëndës dhe konform nenit 248 të KPPRK-së.

Gjykata pas pranimin të fajësisë nga i akuzuari, si dhe marrjes së mendimit të palëve, respektivisht prokurorit të shtetit si dhe provave që gjenden në shkresat e lëndës vërteton se janë përmbushur të gjitha kushtet ligjore të parapara sipas dispozitës së nenit 248 par.1 të KPPRK-së, dhe e aprovoi pranimin e fajësisë nga ana e të akuzuarit në shqyrtimin fillestar, andaj gjykata konform nenit 248 par.4 të KPPRK-së, ka vazhduar me shqyrtimin e dënimit.

Gjatë procedurës penale nuk janë paraqitur rrethana të cilat do ta përjashtojnë përgjegjësinë penale të akuzuarit, kështu që i njëjti është penalisht përgjegjës.

Në bazë të gjendjes faktike të vërtetuar nga vet i akuzuari, gjykata vlerëson se në veprimet inkriminuese të akuzuarit A.P., përmbushën të gjitha elementet qenësore të veprës penale Mbajtja në pronësi, kontroll ose posedim të paautorizuar të armëve nga neni 374 par.1 të KPRK-së për çka gjykata gjeti se i akuzuari në aspektin penal-juridik është përgjegjës dhe të njëjtin e shpalli fajtor, andaj i shqiptoi dënim si në dispozitiv të aktgjykimit.

Me rastin e vendosjes së llojit dhe lartësisë së dënimit, gjykata pati parasysh të gjitha rrethanat e parapara me nenin 73 dhe 74 të KPRK-së, dhe në rastin konkret si rrethana lehtësuese gjeti faktin se i akuzuari në shqyrtimin fillestar e ka pranuar në tërësi fajësinë për veprën penale e cila i vihet në barrë, i gjendjes së dobët ekonomike, mbajtës i vetëm i familjes, ndërsa si rrethana veçanërisht rënduese gjykata nuk gjeti. Ashtu që gjykata ka ardhur në përfundim se dënimi i shqiptuar të akuzuarit është në përputhje me peshën e veprës penale, shkallën e përgjegjësisë penale të tij dhe me intensitetin e rrezikimit të vlerave të mbrojtura të shoqërisë. Gjukata gjithashtu është e bindur se vendimi mbi dënim do të shërbej për arritjen e qëllimit të dënimit në parandalimin e të akuzuarit nga kryerja e veprave penale në të ardhmen, dhe të bëjë rehabilitimin e tij, por ai duhet të ndikoj edhe si preventivë e përgjithshme për personat tjerë që t'i parandaloj nga kryerja e këtyre veprave penale, të gjitha këto të parapara me nenin 41 të KPRK-së.

Vendimi mbi zëvendësimin e dënimit me gjobë, në dënim me burgim është marrë në kuptim të nenit 46 par.3 të KPRK-së.

Vendimi mbi shqiptimin e dënimit plotësues-konfiskimin e sendit-të armës dhe gjësendeve tjera të mbajtura, në mënyrë të paautorizuar, gjykata e ka marrë në bazë të nenit 62 par.1 dhe 2 nën par.2.7, nenit 69 par.1 të KPRK-së.

Vendimi mbi shpenzimet e procedurës penale dhe paushallit gjyqësor u morr në bazë të nenit 450 par. 1 dhe 2 pika 2.6 lidhur me nenin 453 par.1 të KPRK-së dhe vendimi në emër të kompensimit të viktimave të krimit është marrë, konform nenit 39 par.3 nënpar 3.1 të Ligjit nr.05/L-036 për Kompensimin e Viktimave të Krimit.

Nga sa u tha më lartë e në bazë të nenit 365 të KPRK-së, u vendos si në dispozitiv të këtij aktgjykimi.

GJYKATA THEMELORE PRISHTINË-DEGA PODUJEVË
Departamenti i Përgjithshëm-Divizioni Penal
P.nr.625/2018, me dt.02.04.2019

Sekretaren Juridike
Fatmire Podvorica

Gjyqtari i vetëm gjykues
Minir Hoti

KËSHILLË JURIDIKE:

Kundër këtij aktgjykimi mund të ushtrohet Ankesë në afat prej 15 ditësh nga dita e pranimit të njëjtit, Gjykatës së Apelit në Prishtinë nëpërmes kësaj Gjykate.